

Na osnovu člana 7. Odluke o kriterijima za dodjelu sredstava sa pozicije grantovi neprofitnim organizacijama iz budžeta Unsko-sanskog kantona za 2025. godinu, donesene na 21. sjednici Vlade Unsko-sanskog kantona održanoj 27.11.2025 godine, i člana 39. stav (1) Zakona o izvršavanju Budžeta USK ("Službeni glasnik Unsko-sanskog kantona", br. 1/25), ministar Ministarstva zdravstva, rada i socijalne politike objavljuje

Javni poziv za dodjelu sredstava sa pozicije grantovi neprofitnim organizacijama iz budžeta Unsko-sanskog kantona za 2025. godinu

I Predmet javnog poziva:

Predmet javnog poziva je dodjela sredstava iz Budžeta Unsko-sanskog kantona za 2025. godinu za finansiranje/sufinansiranje projekata, programa i aktivnosti udruženja socijalnog i humanitarnog karaktera, a koji su od interesa za građane Unsko-sanskog kantona ili doprinose razvoju i afirmaciji Unsko-sanskog kantona i provode se na području Kantona.

II Pravo učešća

Pravo učešća po ovom Javnom pozivu imaju kantonalna udruženja koja zbog humanitarnog karaktera uživaju određenu finansijsku potporu, te koja apliciraju za sredstva iz Budžeta u svrhu finansiranja/sufinansiranja projekata, programa i aktivnosti socijalnog i humanitarnog značaja, a koji su od interesa za građane Unsko-sanskog kantona ili doprinose razvoju i afirmaciji Unsko-sanskog kantona i provode se na području Kantona.

III Kriteriji za učešće

Udruženja podnose prijavni obrazac za finansiranje projekta, programa ili aktivnosti udruženja iz Budžeta Unsko-sanskog kantona za 2025. godinu sa dokazima o ispunjavanju općih i posebnih kriterija navedenih u Odluci o kriterijima za dodjelu sredstava sa pozicije grantovi neprofitnim organizacijama iz budžeta Unsko-sanskog kantona za 2025. godinu.

Opći kriteriji su:

- a) da je udruženje registrovano kod nadležnog kantonalnog organa i koja su osnovana u skladu sa Zakonom o udruženjima i fondacijama – jedan bod;
- b) da se radi o udruženju koje ima kapacitete (ljudske, tehničke i materijalne) da provede projekat, program ili aktivnosti – dva boda;
- c) ekonomska ili društvena opravdanost projekata, programa i aktivnosti udruženja – tri boda.

Posebni kriteriji koji će se cijeliti prilikom ocjene zahtjeva su:

- a) Zaštita prava i podrška djece i mladih, podrška obitelji i starijim osobama – maksimalno 5 bodova:
 - Jačanje roditeljskih kompetencija;
 - Jačanje kapaciteta i podrška jednoroditeljskim porodicama;
 - Podrška razvoju hraniteljstva;
 - Priprema mladih za izlazak iz ustanova i program podrške mladima;
 - Razvoj kompetencija pružatelja socijalnih usluga za djecu i mlade bez odgovarajućeg roditeljskog staranja;
 - Razvoj kompetencija pružatelja usluga za starije osobe;
 - Pобољшanje kvalitete života i brige za starije (organizacija slobodnog vremena, pomoć u kući i slično);

- Savjetovalište, psihosocijalna pomoć i integracija u život zajednice ranjivih kategorija;
 - Edukacije, analiza i praćenje stanja na području zaštite prava djece i mladih, podrške porodici i starijim osobama, te žrtvama nasilja;
 - aktivnosti u vezi s brigom o djeci u sukobu sa zakonom, te djeci koja prose na ulicama, kao i aktivnosti u vezi s promocijom Konvencije o pravima djeteta;
 - unapređenje zdravlja i kvalitete života ranjivih skupina: djece, mladih, osoba s invaliditetom (djece i osoba starijih od 65 godina).
- b) Analiza, praćenje i smanjenje siromaštva i socijalne isključenosti, podrška beskućnicima, osobama u stanju socijalne potrebe i marginaliziranim skupinama – maksimalno 5 bodova:
- Pomoć osobama u stanju socijalne potrebe i porodicama;
 - Poticanje razvoja usluga alternativnog smještaja i socijalnog uključivanja beskućnika;
 - Poticanje zapošljavanja osoba s većim rizikom od socijalne isključenosti (osobe u sistemu socijalne skrbi, mladi bez roditeljske brige i sl.).

Neprihvatljivim troškovima smatrat će se oni koji se ne mogu dovesti u direktnu vezu sa namjenom projektnih aktivnosti i programskim opredjeljenjem udruženja, kao i oni koji svojom visinom utrošenog iznosa izlaze iz okvira socijalnog karaktera namijenjene podrške.

IV Dokumentacija

Dokumentacija koja se treba dostaviti prilikom prijavljivanja za finansiranje/sufinansiranje projekata, programa i aktivnosti udruženja:

- a) Popunjen zahtjev – prijavni obrazac za finansiranje/sufinansiranje projekata, programa i aktivnosti udruženja, koji sadrži: naziv projekta, programa ili aktivnosti, obrazloženje ekonomske ili društvene opravdanosti projekata, programa i aktivnosti (opis problema/potreba, ciljeve i ciljne grupe) – opis aktivnosti koji se odnose na posebne kriterije tražene članom 5; pregled kapaciteta za provođenje projekta, programa ili aktivnosti (oprema, prostor i osoblje); ukupan iznos sredstava potrebnih za finansiranje/sufinansiranje projekata, programa i aktivnosti, očekivani iznos sredstava iz Budžeta Unsko-sanskog kantona, te procenat od očekivanog iznosa sredstava koji bi bio utrošen na rad udruženja;
- b) rješenje o registraciji izdato od strane nadležnog organa;
- c) zapisnik sa posljednje održane skupštine udruženja;
- d) uvjerenje o poreskoj registraciji - identifikacioni broj;
- e) uvjerenje o izmirenim poreskim obavezama;
- f) uvjerenje o izmirenim porezima i doprinosima za zaposlenike (ukoliko ima zaposlenika);
- g) bilans stanja i bilans uspjeha ovjereni od strane Finansijsko-informatičke agencije za prethodnu godinu;
- h) finansijski izvještaj o utrošku sredstava za finansiranje/sufinansiranje programa i rada udruženja u prethodnoj godini (osim ukoliko nisu finansirani u protekloj godini iz Budžeta USK ili su registrovani u prošloj godini);
- i) naziv banke i podaci o transakcijskom računu.

Udruženje koje nema uposlenih i neizmirenih obaveza može dostaviti ovjerenu izjavu kod nadležnog organa da nema uposlenih i neizmirenih obaveza kojom to potvrđuje.

Udruženja koja su registrovana u prethodnoj godini i nisu dobili sredstva za finansiranje/sufinansiranje projekata, programa i aktivnosti udruženja, nisu dužna da dostave izvještaj o urednom finansijskom poslovanju (bilans stanja i bilans uspjeha).

Dokumenti koji se podnose kao dokaz o ispunjavanju kriterija iz ovog poziva se trebaju predati u originalu i kopiji. Kompletna dokumentacija treba biti poredana po naprijed navedenom redoslijedu.

Zahtjevi primaoca finansijske podrške za realizaciju projekata, programa i aktivnosti koji nisu dostavili izvještaj o utrošku sredstava za aktivnosti udruženja za koji su imali u prethodnom periodu odobrena budžetska sredstva, ne mogu biti prihvaćeni za finansiranje za narednu godinu.

Zahtjevi primaoca finansijske podrške za realizaciju projekata, programa i aktivnosti za koje se utvrdi da su sredstva utrošili nenamjenski, mogu biti prihvaćeni za finansiranje za narednu godinu ukoliko dostave dokaz o povratu nenamjenski utrošenih sredstava.

Pravna lica kojima sredstva budu odobrena po ovom Javnom pozivu će sa Ministarstvom potpisati ugovor o međusobnim pravima i obavezama.

Udruženja kojima sredstva budu odobrena po ovom Javnom pozivu su dužna ista iskoristiti u određenom omjeru i to:

- a) minimalno 85% odobrenih sredstava za projekte, programe i aktivnosti udruženja;
- b) maksimalno do 15% odobrenih sredstava za rad udruženja.

V Podnošenje prijava

Prijavni obrazac za finansiranje projekta, programa ili aktivnosti udruženja iz Budžeta Unsko-sanskog kantona za 2025. godinu (Obrazac 1) se nalazi na web stranici Vlade Unsko-sanskog kantona, zajedno sa javnim pozivom ili se može preuzeti u prostorijama Ministarstva.

Prijave sa potrebnom dokumentacijom dostaviti u zatvorenoj koverti na protokol Vlade USK ili poštom na adresu: Ministarstvo zdravstva, rada i socijalne politike Unsko-sanskog kantona, Ulica Alije Đerzeleza br. 2, 77000 Bihać, sa naznakom "Prijava na Javni poziv za dodjelu sredstava sa pozicije grantovi neprofitnim organizacijama iz budžeta Unsko-sanskog kantona za 2025. godinu - ne otvaraj".

Rok za podnošenje prijava po ovom Javnom pozivu je 8 dana od dana objavljivanja na web stranici Vlade Unsko-sanskog kantona i oglasnoj tabli Ministarstva zdravstva, rada i socijalne politike.

Visinu sredstava za raspodjelu po ovom Javnom pozivu utvrđuje resorno ministarstvo na osnovu odobrenog Budžeta USK za 2025. godinu, te zaprimljenih zahtjeva.

Nepotpune i neblagovremene prijave neće se uzimati u razmatranje.

